

جنوبی آذربایجان قلم انجمنی سلمان رشدی یه قارشى آپاریلان وحشیجه سینه سوقصدی قیناماغا چاغیریر

«شیطان آیه لری» کتابی نین یازاری آدلیم یازیچی سلمان رشدی، اوت آیی نین اون ایکینجی سینده (21 مرداد) اصلیتی لبنانلی مسلمان بیر آمریکا وطنداشی واسیطه سیله آغیر یارالاندى.

بو سوقصد، آردی کسيلمه یین باشقا ترورلارین دوامی ساییلیر. کئچنلرده ده، مختلف اؤلکه لرده بو کتابی نشر و ترجمه ائده نلرده ن بیر نچه سی، بئله ترور و سالدیریلارا قوربان گئتمیشدیلر.

بوتون بو ترورلار و جنایتلر اسلام جمهوریسى نین وفات ائتمیش اولان رهبری خمینی نین باشی آلتیندا و اونون فتواسی نین نتیجه سی دیر.

اسلام جمهورى سینین چیرکین حیاتی نین تاریخی، مینلر و مینلر انسانین او جمله ده ن اونلار یازیچی و ژورنالیست یین قانی ایله یازیلیمیشدی. بو رژیم قیرخ دورت ایل عرضینده غیر فارس ملتله منسوب اولان بیر چوخ انسانین و یا خود یوزلر شیعه اولمایان باشقا دین منسوبلارینین قانینی آختمیشدی.

خمینی، سلمان رشدی یه قارشى اعلان ائتدییی فتواسی ایله، اسلام جمهوریسى نین ترور و باسقى آپاراتینی، باشقا اؤلکه لرین وطنداشلارینا قارشى دا یؤنتمیشدی. اصلینده خمینی بو فتوا ایله بیر ترور و جنایت پاندورا قوطی سینى آچمیشدی کی، نینجه سینده نچه نچه یازیچی و ژورنالیست، فاناتیک مسلمانلارین ترورلارینا قوربان گئتمیشدیلر.

میلادی 1993- ینجی ایله تورکیه جمهوریت ینده شیطان آیه لری کتابی نین مترجمی عزیز نسین ایله بیرلیکده اولانلارا قارشى حیاتا کئچیریلن سوقصد و تروردا 30 نفرین اؤلدورولمه سی، ایراندا «زنخیره ای قتل لر» آدلانان ترورلاردا اؤلدورولن یازیچی و مترجملر، ژاپون اؤلکه سینده شیطان آیه لری کتابی نین مترجمی نین قتله یئتیریلمه سی و هابئله فرانسادا شارلی ابدو ژورنالینا قارشى آپاریلان باسقیندا اؤلدورولن ژورنالیستلر، هامیسی بو فتوانین قوربانلاری ساییلیرلار.

سلمان رشدی یه سوقصد ائده ن لبنانلی - آمریکالی هادی مطر، لبنان دا فعالیت گؤسته ره ن «حزب الله» تشکیلاتینا منسوب دی.

بو تشکیلاتی یارادان و اول گونده ن اونلارا مادی و لجستیک یاردیم ائده ن و بوتون گوج ایله بو تشکیلاتین آرخاسیندان دوران، اسلام جمهورى سی دی.

دئمه لیبیک کی، اسلام جمهوریسى دفعه لرله حزب الله ین الی ایله بو رژیمه قارشى چیخانلاری آرادان گؤتورموشدور.

برلین شهرینده میکونوس رستوران یندا ایران کوردلرینه منسوب دموکرات پارتی سینین رهبرلرینه قارشى سوقصدی، اسلامی رژیم بو تشکیلانین الی ایله حیاتا کئچیرمیشدی.

دوغردور کی، خمینی نین فتواسیندان سونرا اسلامیست قووه لر هر بیر فرصت ده سؤز و قلم آزادلیغینا قارشى اللرینده ن گله نی اسیرگه مه میش و بوتون بو ایللرده اسلام جمهوری سینین تام حمایه سینى قازانمیشلار، لاکن دیگر طرفده ن سلمان رشدی نین یانچیلاری بوتون اؤلکه لرده، او جمله ده ن اسلام رژیمی نین باسقى سی آلتیندا اینله ین ایران اؤلکه سینده هر گون بیر آزدا چوخالمیشدیلار.

سلمان رشدی یه قارشى سوقصد تکجه بیر انسانا قارشى آپاریلان چیرکین بیر عمل دئییل، اصلینده سؤز و قلم آزادلیغینا قارشى آپاریلان وحشیجه سینه بیر آکت ساییلیر. جنوبی آذربایجان قلم انجمنی اؤزونو دموکرات آدلانديران هر کسی سلمان رشدی یه قارشى آپاریلان وحشیجه سینه سوقصدی قیناماغا چاغیریر.

اؤزلرینی دموکرات آدلانديران اؤلکه لر، یازیچیلارا و ژورنالیستلره دیوان توتان ایران اسلام جمهوریسینه قارشى ایکی اوزلو سیاست لرینه سون قویمالیدیلار.

هئچ کیمسه نین - هر باهانا ایله اولورسا، اولسون - سؤز و قلم آزادلیغینا قاداغا قویماسینا اذن وئرمه مه لیبیک!...

جنوبی آذربایجان قلم انجمنی سلمان رشدی نین یانیندا دی.

جنوبی آذربایجان قلم انجمنی

23 اوت 2022 (1 شهریور)